

# An de Slipsen hangen vööl Erinnerungen

VAN HINNI  
TRAUERNICHT UT  
SPETZ

„**W**at wullt du mit so vööl Slipsen?

Dien half Kleerschapp hangt vull van Slipsen“, hull mien Ollske mi anerlesdens vör. Ik sull doch mal rechtschaapen uprümen un wat

van de oll' Slipsen wegsmietten, meende se. „Wegsmieten? Dat kummt nich in Fraag“, was mien Antwort. „Dar hangen to vööl Erinnerungen an“, verklaarde ik hör un gung de Slipsen mit hör dör. „Hier is en mit das Wappen van Landkreis Auerk“, vertellde ik hör. „De hett de damalige Landraat Hinni Swieter – he is all vööl Johr'n dod – mi persönlich schunken. Un disse Slips wiest dat Wappen van Footballkreis Auerk. Giff't all lang nich mehr. De hebb ik van Erdreich Ott kregen, de was damals Vörsitter“, verklaarde ik hör. „Un disse wiest dat Wappen van de Footballverband Neddersachsen, dat was mal en Geschenk van Hermann Lüken ut Lingen, de wer dor Vörsitter van de Bezirk Weser-Ems“, gung dat wieder. „Un dat is en heel besünnern Stück. De is van de Oostfreeske Landskupp un in de Farben van Oostfreesland hollen“, sä ik. „De hett mi Joa-



HINNRICH  
TRAUCHERNICHT

chim Queck schunken, he was Baas van de Oostfreeske Brandkass“, verklaarde ik hör. Un denn hangt dor noch de swarde Slips, de ik alltied umdo, wenn en Minske na de Karkhoff brocht word. Ok de kann ik nich wegsmietten. Dorto komm'n noch Stück of wat moije, ok

bunte Slipsen, för bliede Saaken, so as Hochtieden oder Kinnerdööp. Ik mag gern Slips umhemmen. Wo sück de Tieden ännert hebben! Wenn vandaage in Fernseh'n Ministerpräsident proten deiht, hett he selten en Slips um – nett-gliek, of Söder ut Bayern of Weil ut Neddersachsen. Nett uns Bundespräsident hebb ik noch noit sünner Slips seihn – dat Amt is to würdig, um so salopp rumtolopen as de Ministerpräsidenten van uns Bundeslannen. Vör Johr'n wur man scheef ankeken, wenn man bi en „festlich Anlass“ sünner Slips kwem. Dat is vandaage lang nich mehr so. De Tieden ännern sück nu mal, dat is all alltied so west. Ik smiet mien Slipsen ober nich weg, ok wegen de Erinnerungen, de daran hangen... Vielleicht maak ik mi in uns Kleerkammer noch mal en lüttje „Slipsmuseum“ open. Well weet.